

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 92/38

ք.Երևան

08 դեկտեմբերի 2023թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով «Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» Հայաստանի Հանրապետության 2016 թվականի դեկտեմբերի 16-ի ՀՕ-260-Ն օրենքի համաձայն լուծարումը չեղարկելու վերաբերյալ ««1.500.000+1» ՀԱՅՐԵՆԻՔ-ՍՓՅՈՒՌՔ ՄՇԱԿՈՒԹԱՅԻՆ ԿԱՄՈՒՐՁ» ՀՄ-ի (ՀՎՀՀ՝ 01242967) դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

««1.500.000+1» ՀԱՅՐԵՆԻՔ-ՍՓՅՈՒՐՔ ՄՇԱԿՈՒԹԱՅԻՆ ԿԱՄՈՒՐՁ» հասարակական միավորումը (այսուհետ նաև՝ կազմակերպություն) ստեղծվել և գործում է 2008թ.-ից, ի հիշատակ հայոց ցեղասպանության զոհերի և ևս մեկ զոհ՝ Հրանտ-Դինքի: Կազմակերպությունը լինելով շահույթ չհետապնդող, վերջին տարիներին ֆինանսային փոխանցումներ չեն կատարվել, սակայն հաշվետվություններ դրանց վերաբերյալ տրվել են: 2015թ.-ին կազմակերպությանը տրվել է 002 ներդիր և կազմակերպությունը շարունակել է իր գործունեությունը և գործում է ՀՀ օրենսդրության, ՀՀ միջազգային պայմանագրերի և սույն կանոնադրության հիման վրա, նաև կազմակերպությունը գործում է ՀՀ ողջ տարածքում և օտարերկրյա պետություններում՝ այդ պետությունների օրենսդրությանը համապատասխան: Կազմակերպության հիմնադիր-նախագահն հանդիսանում է Արման Լևոնի Ավետիսյանը: Նախագահի անձնագրի ժամկետը լրանալու և նոր անձնագրի տվյալները Պետական ռեգիստրում ներառելու նպատակով, նախագահն դիմել է ռեգիստր որոշակի ճշտումների համար և տեղեկացել է ինչ որ որոշման մասին, որի մանրամասները չեն ասել: Նախագահին դիմել է ՊԵԿ, որտեղից էլ տեղեկացել է թիվ 656 հրամանի մասին, որը կայացվել է 21.06.2022թ.-ին, ինչի մասին ոչ մի տեղ չի նշվում:

Կազմակերպությունը նշում է, որ չի տեղեկացվել ոչ փոստի և ոչ էլ հեռախոսազանգի միջոցով, որոնք չեն փոփոխվել: Ավելին՝ գտնում են, որ առկա է քրեական հետապնդում,

միտումնավոր, կանխամտածված է արվում, ինչի պատճառով տուժում է ոչ միայն կազմակերպությունը, նաև կազմակերպության անդամները, հետևաբար սա դիտարկվում է որպես միտում կամ անփութություն չարաշահելով պաշտոնական դիրքը: Քանի որ բանկում ժամանակավոր փոխանցումների բացակայությունը հարկային մարմին իրավունք չի վերապահում ինքնաբուխ որոշումներ կայացնել ներքին կարգով:

Ելնելով վերոգրյալից և կատարած ոչ իրավաչափ գործողությունների փաստական հանգամանքներից, պահանջում են՝

Վերոնշյալ որոշումը համարել ոչ իրավաչափ և անհապաղ վերականգնել կազմակերպության գործունեությունը ՀՀ-ում իր կանոնադրության կետերին համապատասխան:

2. Դիմում-բողոքի քննության համար էական նշանակություն ունեցող փաստերը

Համաձայն «Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» ՀՀ 2016թ.-ի դեկտեմբերի 16-ի ՀՕ-260-Ն օրենքի ««1.500.000+1» ՀԱՅՐԵՆԻՔ-ՍՓՅՈՒՌՔ ՄՇԱԿՈՒԹԱՅԻՆ ԿԱՄՈՒՐՁ» հասարակական միավորումը (ՀՎՀՀ՝ 01242967) ներառվել է լուծարվող հարկ վճարողների նախնական ցանկում և 30.12.2017 թվականին լուծարվել է:

«Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» ՀՀ 2016թ.-ի դեկտեմբերի 16-ի ՀՕ-260-Ն օրենքի 2-րդ հոդվածի 1-ին մասի 1-ին կետի համաձայն՝ նույն օրենքի 1-ին հոդվածում նշված լուծարվող հարկ վճարողների նախնական ցանկը կազմելուց հետո հարկային մարմինը մինչև 2017 թվականի մարտի 31-ը ներառյալ ծանուցում է հարկ վճարողներին լուծարվող հարկ վճարողների նախնական ցանկում ներառված լինելու մասին: ««1.500.000+1» ՀԱՅՐԵՆԻՔ-ՍՓՅՈՒՌՔ ՄՇԱԿՈՒԹԱՅԻՆ ԿԱՄՈՒՐՁ» հասարակական միավորումը հարկային մարմնի կողմից ուղարկված ծանուցագիրը չի ստացել (ծանուցագիրը ետ է վերադարձվել 08.05.2017թ.-ին), ինչի հետևանքով գրկվել է Օրենքի 2-րդ հոդվածի 2-րդ մասով սահմանված ժամկետում լուծարվող հարկ վճարողների նախնական ցանկից իրեն հանելու մասին հարկային մարմնին գրավոր տեղեկացնելու իր իրավունքից: Հարկային մարմինը հարկ վճարողից Օրենքով նախատեսված տեղեկատվությունը չստանալով՝ վերջինիս ներառել է Հայաստանի Հանրապետության արդարադատության նախարարության իրավաբանական անձանց պետական ռեգիստրի գործակալություն ներկայացված՝ լուծարման ենթակա հարկ վճարողների ցանկում:

3. Բողոքարկման առարկային վերաբերվող իրավական կարգավորումներ և եզրահանգումներ

«Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» Հայաստանի Հանրապետության 2016 թվականի դեկտեմբերի 16-ի ՀՕ-260-Ն օրենքի (այսուհետ՝ Օրենք) 2-րդ

հողվածի 1-ին մասի 1-ին կետի համաձայն՝ նույն օրենքի 1-ին հոդվածում նշված լուծարվող հարկ վճարողների նախնական ցանկը կազմելուց հետո հարկային մարմինը մինչև 2017 թվականի մարտի 31-ը ներառյալ ծանուցում է հարկ վճարողներին լուծարվող հարկ վճարողների նախնական ցանկում ներառված լինելու մասին:

Օրենքի 2-րդ հոդվածի 1-ին մասի 2-րդ կետի համաձայն՝ լուծարվող (պետական հաշվառումից հանվող) հարկ վճարողների նախնական ցանկը ներկայացնում է գույքի գրանցում (հաշվառում վարող) և (կամ) գույքի նկատմամբ իրավունքներն ու սահմանափակումները գրանցող (հաշվառող) համապատասխան լիազոր մարմիններ:

Օրենքի 2-րդ հոդվածի 2-րդ մասի համաձայն՝ հարկ վճարողները սույն հոդվածի 1-ին մասի 1-ին կետով սահմանված ծանուցումն ստանալուց հետո՝ երկամսյա ժամկետում, հարկային մարմնին գրավոր տեղեկացնում են լուծարվող (պետական հաշվառումից հանվող) հարկ վճարողների նախնական ցանկերից իրենց հանելու մասին:

Օրենքի 2-րդ հոդվածի 3-րդ մասի համաձայն՝ Գույքի գրանցում (հաշվառում վարող) և (կամ) գույքի նկատմամբ իրավունքներն ու սահմանափակումները գրանցող (հաշվառող) համապատասխան լիազոր մարմինները նույն հոդվածի 1-ին մասին 2-րդ կետով սահմանված ցանկերը ստանալուց հետո՝ երկամսյա ժամկետում, հարկային մարմնին տրամադրում են տեղեկատվություն լուծարվող (պետական հաշվառումից հանվող) հարկ վճարողների նախնական ցանկում ներառված այն հարկ վճարողների վերաբերյալ, որոնց մասով առկա է տեղեկատվություն իրենց անվամբ գույք հաշվառված (գրանցված) լինելու մասին,

Օրենքի 2-րդ հոդվածի 4-րդ մասի համաձայն՝ սույն հոդվածի 2-րդ և 3-րդ մասերով սահմանված տեղեկատվությունն ստանալուց հետո սույն օրենքի 1-ին հոդվածով նախատեսված հիմքերի առկայության դեպքում կազմում է լուծարման (պետական հաշվառումից հանման) ենթակա հարկ վճարողների ցանկերը:

Միաժամանակ «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի համաձայն՝ անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է՝ օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով, կեղծ փաստաթղթերի կամ տեղեկությունների հիման վրա, կամ եթե ներկայացված փաստաթղթերից ակնհայտ է, որ ըստ էության պետք է ընդունվեր այլ որոշում:

Ելնելով վերը նշված իրավանորմերի դրույթներից և հիմք ընդունելով սույն որոշման 2-րդ կետում բերված փաստական տվյալները՝ Հանձնաժողովը գտնում է, որ անհրաժեշտ է ոչ իրավաչափ ճանաչել «Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» Հայաստանի Հանրապետության 2016 թվականի դեկտեմբերի 16-ի ՀՕ-260-Ն օրենքի 2-րդ հոդվածի 4-րդ կետի համաձայն հարկային մարմնի կողմից ««1.500.000+1» ՀԱՅՐԵՆԻՔ-

ՍՓՅՈՒՌՔ ՄՇԱԿՈՒԹԱՅԻՆ ԿԱՄՈՒՐՋ» ՀՄ-ի լուծարման ենթակա հարկ վճարողների ցանկում ներառելու գործողությունը:

4. Եզրափակիչ մաս


Ելնելով քննարկման արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հանձնաժողովը

ՈՐՈՇՈՒՄ Է՝

«Հարկային հաշվետվություններ չներկայացրած կազմակերպությունները լուծարելու և անհատ ձեռնարկատերերին պետական հաշվառումից հանելու մասին» Հայաստանի Հանրապետության 2016 թվականի դեկտեմբերի 16-ի ՀՕ-260-Ն օրենքի համաձայն լուծարումը չեղարկելու վերաբերյալ ««1.500.000+1» ՀԱՅՐԵՆԻՔ-ՍՓՅՈՒՌՔ ՄՇԱԿՈՒԹԱՅԻՆ ԿԱՄՈՒՐՋ» ՀՄ-ի դիմում-բողոքը բավարարել:

Սույն որոշումն ուժի մեջ է մտնում իրազեկելուն հաջորդող օրվանից:

12/11/2023

X 

ԼՈՒՍԻՆԵ ՄԿՐՏՅԱՆ

Signed by: MKRTCHYAN LUSINE 5205700203

ՀԱՆՁՆԱԺՈՂՈՎԻ ՆԱԽԱԳԱՀԻ Ժ/Պ

ԼՈՒՍԻՆԵ ՄԿՐՏՅԱՆ